

西
南
紀
事

西南紀事目錄

卷一

桂王由棖

卷二

永寧王周宗

鄭西王常湖

寧靖王術桂

卷三

何騰蛟

堵胤錫

卷四

瞿式耜

嚴起恆

卷五

陳子壯

張家玉

陳邦彥

王興

卷六

李乾德

楊展

王祥

皮熊

卷七

金堡

鄧凱

卷八

沐天波

楊畏知

卷九

李成棟

卷十

李定國

劉文秀

卷十一

金聲桓

卷十二

孫可望

西南紀事卷一

餘姚邵廷采念魯撰 邵武徐 翰小勿校刊

桂王

桂王由根神宗顯皇帝之孫桂恭王常瀛仲子也神宗五子恭王最少母曰李貴妃萬曆二十九年封桂王天啟七年始就國衡州崇禎十六年張獻忠陷衡州王奔廣西留居梧州

大清順治二年乙酉冬薨葬焉請於福建謚曰恭長子安仁王由棖先卒以仲子永明王由棖襲爵唐王命曰天下王之

天下同濟國難無忘艱危嘗欲立王爲嗣未果順治三年
丙戌九月唐王陷於汀州兩廣聞報於是總督丁魁楚巡
撫瞿式耜巡按王化澄侍郎湯來賀及故臣呂大器李永
茂晏日曙朱容藩童天閔林佳鼎方以智程源等大會於
肇慶請王監國前禮部尙書陳子壯趣魁楚遣人入潮惠
審唐王存亡十月二日還報諸臣上箋詣王勸進王手書
報曰諸先生念高皇帝二百七十餘年之統業及毅宗皇
帝一十七載之憂勤一旦滄桑身殉社稷弘光繼立旋復
蒙塵今上親征復罹斯難兩年三變四海盡傷諸先生以

社稷爲重不可無君神廟子孫僅存不穀以理而論義無可辭但自量涼德菲才未堪肩仔兼以連遭禾黍之傷復重蓼莪之慘心荒意謬行坐猶迷地裂天崩何能旋轉嘗聞治世以倫序而變亂以功德惟諸先生徧訪賢藩續承大統太妃王氏亦曰吾兒仁柔非撥亂才也願更擇可者魁楚等固請曰國勢如此強敵將臨殿下親神宗皇帝孫光宗猶子毅宗之弟宜以生民宗社爲念不宜深自謙退願早正大位是月十四日監國肇慶時年三十六加上隆武皇帝尊諡曰紹宗襄皇帝率羣臣大臨三日以魁楚承

茂大器爲大學士共典機務式耜爲侍郎羣臣皆晉秩會
聞贛州敗如梧州十一月蘇觀生以唐王聿錡稱帝廣州
監國乃還至肇慶卽皇帝位以明年爲永曆元年追尊皇
考恭王爲恭皇帝尊太妃王氏爲皇太后生母馬氏爲慈
寧皇太后立妃王氏爲皇后遣給事中彭耀赴廣州諭蘇
觀生見殺詔曰閔牆斯極禦侮維艱誰非高皇帝之裔孫
唐王能出長江復南京者願退歸桂邸是月十五日

大清兵入西充斬張獻忠賊將孫可望李定國奔重慶襲殺總

兵曾英

大清李成棟入潮州惠州魯王次中左所十二月兵部侍郎林佳鼎攻廣州敗沒以太監王坤掌司禮監大學士呂大器李永茂罷朱容藩自請經畧四川遣之李成棟襲廣州殺唐王及周益遼等二十四王蘇觀生自殺王如梧州以宋治欄總督兩廣留守肇慶是月朱成功起於烈嶼

大清順治四年丁亥春正月王在梧州李成棟入肇慶朱治欄出走廣東十郡皆陷王如平樂大學士丁魁楚走岑溪兵部尙書王化澄走潯州成棟至梧州巡撫曹燧出降是月大清兵畧定兩川孫可望入貴州總兵王祥皮熊皆潰走前督

師大學士王應熊薨於畢節朱容藩入夔州遣李占春復涪州李乾德遣袁韜據重慶王祥復保遵義是月魯王次於長垣以熊汝霖爲相二月王至桂林遣使湖南勞督師定興侯何騰蛟且徵其兵騰蛟以

大清兵近辭不至大學士平粵伯丁魁楚敗死藤江

大清兵陷平樂王幸全州命瞿式耜兼吏兵尙書留守桂林封陳邦傅爲思恩侯守昭平武岡守將劉承胤入衛免王坤封承胤爲安國公杖御史毛壽登等四人賞從駕勞封馬吉翔爲文安侯掌絲綸房事三月幸武岡以嚴起恒爲大

學士

大清李成棟圍桂林給事中陳邦彥起兵高明遣其將余龍攻
廣州兵侍郎張家玉起東莞應邦彥是月孫可望入雲南
巡撫都御史羅國獻宗室朱壽琳死之沙定洲走阿迷皮
熊收復貴州夏四月

大清孔有德破長沙何騰蛟退保衡州忠貞帥李赤心攻荊州
不克湖南北皆潰騰蛟朝武岡行在是月

大清松江守將吳勝兆謀來歸事泄及遣臣陳子龍等皆死之
五月桂林圍解晉瞿式耜太子太師封臨桂伯總兵焦璉

富川伯

大清兵入衡州命何騰蛟出扼永州湖南巡撫章曠卒於永安
張家玉自龍門進攻惠州虎賁將軍王與保文村廣東鄉
兵特起是月安昌王恭楨如日本乞師秋七月故大學士
陳子壯攻廣州前御史麥而炫以高明迎子壯焦璉復平
樂陳邦復潯州同復梧州遺紳李星一等攻肇慶不克
死是月魯王攻漳州福州鄭鴻逵朱成功圍泉州皆不克
八月六日

大清孔有德耿仲明破寶慶遂乘勝西入王自至武岡制於承

唐太后血詔賜古泥商邱伯侯性告以難性令部將謝復榮先入衛而已嗣發

大清兵進至紫陽河陳友隆阻險相持三日夜尙可喜自道州至合戰夜破柵進抵武岡承胤降兵部尙書傅作霖死之十八日馬吉翔謝復榮奉王及三宮斬關出

大清兵追躡相距三里復榮斷後與其卒五百人俱死王家堡王徒行三十里兩晝夜不食幾及會性率兵奄至陣峽口大軍乃退由靖州通道歷蠻境五日達古泥晉性解符侯吉翔文安侯哭復榮卹其家明日王幸柳州

大清兵入貴州境破黎平盡殺何騰蛟之家是月孫可望遣兵入永昌執黔國公沐天波以歸遂據雲南九月

大清兵入永州何騰蛟及諸將俱南保桂林李成棟入清遠故大學士朱學熙給事中陳邦彥指揮白晷燦死之冬十月柳州軍亂王幸象州兵部尙書張家玉敗死增城是月魯王復閩中諸縣故大學士劉中藻起兵福安取福甯州十一月李成棟入高明大學士陳子壯御史麥而炫死之是月三日王自象州還至桂林靖江王亨歡迎王而哭瞿式耜嚴起恒並相中外想望新政命曰卽位一載未有寧居

賴將相大臣和衷匡復凡我故家名族軍伍遺民以及山林川澤之豪挺戈建義羌苗氏貊之長解辦歸誠咸與釋愆圖功剖符立誓王寬仁恭默虛己委任無逸豫之過然自常朝召對外羣臣希得接見左右倖佞因爲奸弊文安侯吉翔招權內結宦者外通思恩侯邦傳自象柳行在票擬皆出其手比至桂林專與機密式耜起恒雖被敬禮不能與爭朱天麟王化澄繼相僅守故事而司禮龐天壽奉使恭視興陵未還王坤入自武岡復營進用政令紛囂方鎮驕情由是遠近不服十二月令督師騰蛟帥總兵胡一

清趙應選等出屯全州是月舟山總兵黃斌卿攻寧波不克諸生華夏等死之是年朱容藩據夔州自稱監國招討副元帥總督李乾德會師討斬容藩故大學士呂大器薨于獨山州

大清順治五年戊子春正月王在桂林魯王兵復興化鄭彩殺大學士熊汝霖義興侯鄭遵謙二月

大清兵薄桂林督師騰蛟留守式耜禦卻之南昌守將金聲桓以江西來歸封聲桓爲豫國公其將王德仁爲建武侯是月馬進忠復常德閩地復破魯王退保沙埕餘姚王翊起

兵四明前翰林學士張焯言保平岡以應之金聲桓攻贛州安南黎莫二部入寇犯行在夏四月后生男督師騰蛟及焦璉胡一清等退

大清兵於嚴關五月

大清兵還武昌騰蛟收復全州李成棟却其總督佟養甲以廣東來歸封成棟惠國公養甲襄平伯命吏部侍郎吳貞毓宣諭廣東太僕少卿黃尙賓宣諭江西六月遣留守式耜侍郎劉遠生如全州廣州勞軍黃斌卿使馮京第入日本乞師八月朔癸巳王自南寧還至肇慶惠國公成棟負弩

矢郊迎百里外副將杜永和以下前驅從騎四萬冊命成棟爲翊明大將軍以其子元胤爲錦衣都指揮掌絲綸房事擢袁彭年左都御史粵東羣盜保山澤者皆入獻請自效王命成棟夾攻贛州以合聲桓同恢南京

大清固山譚秦圍南昌命騰蛟速出湖南援江西十一月騰蛟克永州衡州馬進忠退

大清兵於麻河佟養甲伏誅召故相何吾翳黃士俊輔政十二月湖北巡撫堵胤錫棄常德奔湘潭湖南軍亂命騰蛟帥馬進忠圍長沙胤錫帥忠貞營援江西忠貞營不進是年

封嘉定鎮將楊展爲華陽伯晉錦江侯

大清順治六年己丑春正月王在肇慶罷大學士朱天麟

大清譚泰拔南昌聲桓得仁被殺故大學士姜曰廣死之定興
侯騰蛟兵潰死長沙二月罷大學士王化澄惠國公成棟
敗死信豐時三喪大將連失江西湖南嶺表震恐命留守
式耜督江湖兩廣軍馬以杜永和代成棟鎮廣州閻可義
守南雄封李元胤爲南陽伯領兵宿衛人情少定李赤心
等潰茶陵行剽走梧州堵胤錫走道州可義尋卒以羅成

耀代三月

大清兵入衡永諸軍南保廣西封王祥爲忠國公夏四月福安
破故大學士劉中藻死之孫可望使楊畏知入朝陳邦傅
矯制封可望爲秦王六月杜永和請出師北上不果行左
都御史袁彭年以憂去秋七月封孫可望爲平遠王不受
是月魯王徙居健跳八月罷大學士何吾騶朱成功遣光
祿卿陳士京入朝閩海始奉年號封川守將楊大福作亂
討誅之九月魯王討斬黃斌卿移屯舟山遣使如日本乞
師冬十一月堵胤錫死於潯州十二月

大清兵分道入嶺孔有德趨廣西尙可喜耿仲明趨廣東仲明

死子繼茂襲爵是月晦入南雄羅成耀棄韶州逃歸是年春李乾德袁韜誘殺錦江侯楊展并其兵

大清順治七年庚寅春正月韶州破王至梧州命李元胤留守肇慶大學士黃士俊免二月

大清尙可喜耿繼茂襲清遠圍廣州杜永和張月李建捷力戰禦之戶尙書吳貞毓禮侍郎郭之奇兵侍郎程源萬翱等合疏論左都御史袁彭年侍郎劉湘客給事中丁時魁金堡蒙正發招權誤國罪王及太后亦意羣臣有黨詔獄竟治以功赦彭年餘皆杖戍大學士嚴起恒伏沙灘求免刑

不聽遂罷去以王化澄朱天麟代之王憂廣州進杜永和等爲侯伯永和乞師於碣石鎮蘇利不應二月嶺東道李士璉總兵郝尙久黃應傑以潮惠二州降

大清殺滋陽銅陵興化永豐等八王巡撫王芋逃入山中是月王翊朝魯王於舟山夏五月李元胤及鄖國公高必正興平侯党守素朝於梧州召復大學士嚴起恒命必正出救廣州不奉命安定伯馬寶襲清遠敗歸命故大學士何吾騶督師屯三水秋七月颶風盪舟求直言八月孫可望再遣使求封秦王不許嚴起恒主之也是月

大清田雄會兵餘姚攻王翊翊避入海島魯王將張名振討破
鄭彩兵於沙埕九月孫可望襲貴州執匡國公皮熊遂趨
遵義王祥走死湖南大將馬進忠張先壁皆歸於可望冬
十月朔癸巳日有食之十一月二日廣州破杜永和張月
以餘衆保瓊州李建捷奔肇慶肇慶裨將叛李元胤建捷
出走

大清孔有德破全州入嚴關諸軍皆潰遂入桂林留守大學士
臨桂伯瞿式耜總督兵侍郎張同敞死之

大清兵進克平樂王夜發梧州走南寧陳邦傳劫車駕於廉江

殺部郎潘駿觀許玉鳳董英前至潯州王舟衝雨而過得免服御被掠邦傳以鹵簿僭陳營中大學士王化澄吏部尚書晏清等俱走北流不得達二十八日王至南寧馬吉翔李元胤追及從官飢餓無人色括御橐及吉翔所獻得四千金分賜胡一清趙應選帥滇兵屯賓州

大清順治八年辛卯正月朔己酉王在南寧己未祀太廟詔東閣大學士吏兵尚書文安之督師經畧楚粵賜尙方劍便宜行事二月

大清尙可喜將徐成功下高州提督李明忠敗於陽江羅定總

兵郭登第降是月

大清兵襲廈門故大學士曾櫻死之三月孫可望使其將賀九儀以兵入南寧殺大學士嚴起恆兵尙書楊鼎和給事中劉堯珍及吳霖張載述等於朝於是封可望爲秦王以楊畏知爲大學士輔政夏四月皇太后王氏崩

大清徐成功下廉州總兵甯武忠出戰大敗雷州渠帥王翰等皆降

大清尙可喜使班志富郭虎引兵徇潮惠之未附者都督薛進戰死海豐嶺東皆入虜

大清五月修中極宮行日講秦王可望召太學士楊畏知至貴州殺之秋七月祀太廟中元望祭諸陵十八日葬孝正王太后於兩江之宋村山是月王翊自島還入四明軍潰被執死之八月

大清陳錦金礪攻舟山張名振張煌言奉魯王奔閩海蕩湖伯阮進戰死於海門九月舟山破大學士張肯堂禮尙書吳鍾巒吏侍郎朱永祐等死之冬十月

大清徐成功下雷州南陽伯錦衣衛都指揮使李元盾死之陳邦傳以壽州叛南甯震動王將奔廣南地胡一清趙應選

以潰兵同馬吉翔抵駐難請舍舟由土司安平下雷歸順
間道進發諸蠻皆餽餉服徭秦王可望遣其將狄三品以
兵來迎書致從官曰南寧不守當走安隆粵地從之十二月
安寧破太僕少卿丁元相戶員外郎楊禹甸死之是年秋
冬秦王可望由遵義北擊敗余大海李占春於重慶別將
王自奇劉文秀取川西走袁韜獲武大定以歸總督李乾
德赴水死可望遂據兩川

大清順治九年壬辰春正月朱成功退

大清陳錦兵於長泰二月王至安隆進安隆所爲安龍府以吳

貞毓爲大學士自是軍國大政一歸可望王居處亦不自
由歲以銀八千兩米八百石上供從官咸取給焉命曰在
位五年二三元臣中湘臨桂寧夏南陽父子心膂左右手
也皆成功無就殉節彌光夢寐追傷楚楚在疚去年南寧
荒遜荷秦王親賢股肱迎朕來此王其厲兵張武以圖中
原大小戰爭誅斬封拜先行後奏連歲播越服御自奉其
損之又損以稱待罪天地祖宗之意是月朱成功圍漳州
大清平西王吳三桂定西將軍李墨勒根瑕由漢中入四川守
將白文選走還雲南定南王孔有德自廣西以七百騎出

河池州趨貴州後軍屯柳州秦王可望乃馳奏兵分二道
使李定國馮雙禮由黎平出靖州馬進忠由鎮遠出沅州
會於武岡以圖桂林步騎八萬劉文秀張先璧由永寧取
叙州白文選由遵義取重慶會於嘉定以圖成都步騎五
萬尅期並進從可望奏封定國西寧王文秀南康王餘皆
加公侯夏五月西寧王定國進克靖沅武岡

大清孔有德退守桂林六月將軍雙禮遇大兵於譚湖克全州
秋七月定國遇大兵於嚴關遂克桂林有德自焚死俘其
子廷訓獲叛將陳邦傳斬於貴州

大清柳州守將全節梧州守將馬雄及提督線國安皆還廣東定國進克柳州平樂梧州廣西府縣皆復故將胡一清趙應選馬寶曹志建等出自山谷來歸可望獻捷行在王告祀宗廟是月陳錦爲其下所殺以其首奔朱成功八月南康王文秀下四川及

大清吳三桂李墨勒根瑕戰於保寧敗績都督王復臣死之蜀地復陷可望奏削文秀王爵還雲南九月西寧王定國攻

衡州

大清馬雄等復取廣西耿繼茂下瓊州杜永和張月以城降將

軍文選取辰州斬其守將徐勇冬十月馬寶曹志建復連
州獲守將茅生蕙斬於衡州尙可喜使郭虎來救不及十
一月三日定國及

大清兵戰於衡州害敬謹親王收兵退屯武岡遣使告捷可望
忌定國召還

大清以洪承疇總制滿漢軍經畧南方星夜馳入武昌

大清順治十年癸巳春正月王在安龍魯王次於金門始去監
國號西寧王定國自武岡還入廣西州縣多復秦王可望
及

大清佟圖賴戰於寶慶敗績遂棄湖南歸貴州夏四月定國帥馬寶等圍肇慶

大清潮州守將郝尙久舉兵應之尙可喜救肇慶定國解圍還五月朱成功敗金礪於海澄秋八月

大清耿繼茂哈哈木入潮州新泰侯郝尙久死之九月遣文安侯馬吉翔詣南寧祀孝正皇太后陵冬十一月晉西寧王定國爲晉王十二月秦王可望遣兵至行在執行朝使者林青陽周官及文安侯吉翔至貴州下獄釋吉翔殺青陽官

大清順治十一年甲午春正月王在安龍以馬吉翔爲大學士
三月秦王可望遣兵至行在繫大學士吳貞毓等十六人
於朝執太監張福祿全爲國於官皆殺之晉王定國自柳
州奔南寧將軍雙禮攻桂林不克夏四月

割漳泉惠潮招朱成功不降五月定國自廉州出師故將
張月以高州來歸進圍新會高明秋七月

大清瓊州亂陳武等自稱明將軍合黎岐拒大兵水陸羣盜響
應尙可喜使張國柱度海援瓊州九月晉王定國拔高明
獲守將郭虎遂合兵圍新會

大清將許爾顯固守不下朱成功遣黃梧出海道西援十二月
晉王定國帥師及

大清平南王尙可喜靖南王耿繼茂靖南將軍朱馬喇總督李
率秦燾章京東拜戰於新會敗績是月朔朱成功復漳州

大清順治十二年乙未春正月王在安龍晉王定國奔南寧所
得廣東西府州縣復破

大清瓊州盜平黃梧兵不利引還秋七月秦王可望遣兵攻常
德不克九月朱成功復揭陽澄海普寧徐成功許爾顯來
救不及遂城揭陽故總兵陳奇策馮士騶猶出沒雷廉海

中擊殺

大清將蓋一鵬劉良卿冬子一月朱成功遣阮駿陳雪之團舟
山

大清將巴臣興舉城降成功毒殺定西侯張名振

大清順治十三年丙申春正月晉王定國入見奉王如雲南秦
王可望遣將軍文選以兵追上及於曲靖文選來歸王至
會城黔國公天斌南康王文秀率文武將吏迎謁王入居
可望府中大赦以雲南爲滇都賜定國晉王冊寶進文秀
爲蜀王艾承業爲鎮國將軍理延安王事封文選爲鞏國

公王尙禮爲保國公王自奇爲夔國公餘侯伯有差以金
維新爲吏侍郎兼都御史龔銘爲兵侍郎猶用馬吉翔爲
大學士指揮使如故遣文選還報可望曰誓與晉蜀共獎
明室兩無虞詐可望榜文選不受命三月

大清兵復入揭陽夏五月朱成功改廈門中左所爲思明州六
月黃梧以澄海降秋七月成功攻福州獲大將張禮八月
大清兵破舟山總制陳雪之英義伯阮駿死之

大清順治十四年丁酉春正月王在滇都歸孫可望妻子於貴
州可望舉兵反夏□月劄可望王爵命晉王定國蜀王文

秀討之秋七月出屯交水賊劫鞏國公文選爲元帥文選
逃歸晉爵章昌王八月鄉試雲南士九月賊將馬寶張勝
襲滇都黔國公天波擊走之定國文秀及可望戰於交水
賊將馬惟興馬進忠來歸賊敗走貴州定國還救滇都收
馬寶張勝冬十月可望出降

大清其將馮雙禮以貴州來歸論功封雙禮慶陽王進忠漢陽
王惟興叙國公寶淮國公賀九儀廣國公附可望者德安
侯狄三品岐山侯王會荆江伯張光翠皆降謫有差遣使
渡海封朱成功爲延平王十一月延平王成功攻漳州尙

西南新事
可喜來救乃還

大清順治十五年戊戌春正月王在滇都二月

大清平西王吳三桂定西將軍李墨勒根瑕由四川寧南大將軍宗室羅托由湖廣征南將軍趙布木由廣西三道進取貴州晉王定國使馬進忠守貴州楊武勳正國守三坡紅關三月三桂入合州總兵杜子香棄重慶逃歸是月延平王成功帥師北上次於羊山夏四月

大清兵入重慶二十四日蜀王文秀亮與國公主自奇永壽伯關有才反定國討誅之

大清兵至三坡正國自水西奔還雲南晦遵義陷信郡王多羅
自鎮遠抵貴州雄忠走五月三桂襲破揚武兵於開州之
倒流水水西宣慰使安坤酉陽宣慰使冉奇鏡蘭州宣撫
使者保受皆降於

大清秋七月新津侯譚弘仁壽侯譚義培侯譚文以舟師攻重
慶不克

大清趙布太線國安由廣西抵獨山州冬十月

大清兵俱入貴州多羅繼至會於平越使羅托還鎮荊州命晉
王定國出師圖復貴州假黃鉞鞏昌王文選爲副定國及

馮雙禮扼盤江河水選守七星關十二月二日三桂奪七星關文選奔霑益譚弘譚誼譚文復攻重慶弘誼殺文降於

大清蜀中兵皆散泗城州土官岑繼祿導

大清兵入安龍懷仁侯吳子聖禦之敗績定國由盤江還戰連敗遂奔回滇都十五日奉王西奔永昌文選自霑益追及使留斷後三桂敗文選餘卒於烏撒遂涉河渡橋出交水會多羅趙布太於板橋

大清順治十六年己亥春正月四日王至永昌下書罪已有日

死而後已盜爲六出之兵天若不存書共一舟之覆晉王
定國還黃鉞待罪請削秩不許前一日

大清多羅吳三桂趙布太入滇都侯伯錫爵胡一清土司總兵
龍世榮迎降閏月十五日

大清吳三桂趙布太至大理鞏昌王白文選敗於玉龍關王發
永昌走騰越州十八日三桂入永昌一月晉王定國迎戰
大清兵於磨盤山不勝泰安伯實民望等死之王奔南甸

大清兵入騰越景東土知府陶斗蒙化土知府星海麗江土
知府木懿及諸土知縣官皆降大學士扶綱兵尙書尹三

聘編修劉蒞貴州布政使朱企鏐淮國公馬寶叙國公馬
惟興武靖侯王國璽懷仁侯吳子聖宜川伯高啓隆公安
伯李如碧陽武侯廖魚將軍楊武都督王朝欽總兵單泰
徽皆從王出邊前後入降慶陽王馮雙禮渡金沙江奔建
昌狄三品執之以降

大清封三品爲扞誠侯四川守臣及諸將領兵者皆赴雲南降
大清兵盡定滇蜀磨盤之敗土與定國文選相失乃謀入緬二
十六日抵曩本河前距緬關使黔國公天波入告難勒從
官放仗而入晦至蠻漢一月朔緬酋以四舟來迎得從者

六百四十六人十八日至井亘文選自木邦以兵入緬謀
迓駕戰不勝還走孟良文安侯馬吉翔冀悅緬心諭守關
者王航海赴閩兵勿復來故將祁三昇至蠻漠又檄止之
由是內外間絕天波請問道走戶曠亦不許五月八日王
進赭經編竹城草屋十間爲宮以兵百人環衛從官分處
蠻男婦日至市易初至餽頗豐後漸薄前陸行者總兵潘
世榮內監江國泰九百餘騎皆被給土人爲奴多自殺惟
岷王子十八人後流入暹羅六月延平王成功入瓜州復
鎮江秋七月進圍南京兵部尙書張煌言帥前軍先抵蕪

湖徽盜池太府州縣皆下成功以驕敗上游軍亦潰煌言
間脫走台州八月

大清尙可喜遣使招虎賁將軍王興於文村唐王聿錡及興皆
死之中秋節緬酋受諸蠻朝逼黔國公天波行禮天波歸
哭而慟馬吉翔李國泰等飲王惟恭家爲梨園舞老妓泣
下曰此何時猶爲歌舞歡耶蒲櫻家復縱博聲徹於內王
方臥病嘆息而已天波時獻猷爲王言倉卒入緬本失計
所恃一定國不得合緬意日惡恐禍發旦夕君臣不復相
見臣三百年蒙國恩死無恨王亦泣監御莫能仰視定國

在孟定承制槩加土司勳爵使赴難元江知府那崙起兵
延長伯朱養恩將軍高應鳳總兵許名臣龍贊陽等皆已
降

大清復結謀內應冬十月禮官請造庚子曆從之是月

大清兵北還以吳三桂留慶雲南十一月三桂克元江總督那
崙死之

大清順治十七年庚子春正月王在精羅晉王定國次於近郊
奉表迎王不克時馬吉翔李國泰相爲唇齒猶然泄泄但
害定國之至二人合奏大臣三日不能舉火王怒以皇帝

之璽擲地卽椎碎人數銖御史任國璽請東宮開講進宋
末賢奸書王覽一日國秦惡而去之太常博士鄧居詔禮
部主事王祖望各劾翔泰又傅禮侍郎楊在講書賜坐在
以東宮典璽李崇貴侍立不敢王并賜崇貴坐對曰雖在
亂亡不可廢禮王爲改容每講崇貴出外講畢復入秋七
月定國文選會兵攻緬迎王不得敗緬兵於瑞陽岳故漳
平伯周金湯聚兵雷廉海上結龍門鄧耀海陵李常榮等
圖復嶺西爲尙可喜所敗常榮降御史連城壁亦自陽春
降王與故將王懋德及李玉黃確鄭球皆敗死金湯被執

可喜水陸並進急攻龍門耀出搏戰大敗走交阯交阯殺獲燿舟浮屍蔽海耀復走廣西入土司被縛嶺海由是無用王年號者是年魯王自思明移金門

大清明安達理出浙海達素出閩海

大清順治十八年辛丑春正月王在赭裡鞏昌王文選次於近郊奉表迎王不克晉王定國戰於洞怕文選從之再敗緬兵緬終不肯出王有欲殺吉翔國秦奉東宮奔者事覺被害夏四月緬酋莽猛白代立秋七月十八日逼朝臣過河飲呪水而盟以兵圍殺之死者宗臣松滋王勳臣沐天波

武臣馬吉翔王維恭魏豹蒲縷王啓隆馬雄飛王自京樊
勳陳謙劉相吳承爵安朝柱任子信張拱極宋宗宰劉廣
良宋國柱丁調鼎文臣鄧士廉鄧居詔任國璽楊在郎昌
琦裴庭謨楊生芳王祖望齊應巽潘璜郭璘張伯宗內監
李國泰李茂芳楊宗華楊強益李崇貴沈猶龍周某盧某
曹某等四十有二人從官皆盡遂圍王宮王幾欲縊吉王
與其妃自殺宮人命婦不屈死者及百人緇人馳呼勿害
皇帝黔國公可禮送

大清皇帝處分越日王及侍御二十五人移入天波居秋八月

晉王定國復以十六舟攻緬不克冬十二月朔緬人請移
蹕王及太王后王后王子同行二鼓渡河

大清吳三桂執王入滇都白文選以木邦降始緬難作都督同
知鄧凱以傷足獨免生還述編時事言十一月十八日王
召凱入宮諭曰太后病矣未知骸骨得歸故里否又曰白
文選未封親王馬寶未封郡主我負之滇黔百姓我師侵
擾多年今又不知作何狀明年壬寅四月二十五日王縊
於滇都并殺王子六月二十四日晉王定國死於猛臘李
嗣興劉震艾承業俱出降其年朱成功取臺灣明宗室多

依之張煌言遺書勸成功尊立魯王以存明祀成功有異
志託言以永歷紀年不更事二君煌言卒死杭州

論曰明室既亡桂王僑寄滇粵羈命蠻緬何其不振哉良
由祖宗純任法度主權過亢君臣道隔不修尊賢尚功之
意故其極也驕將擅命盜賊公行國勢日孤大臣夫職既
迫喪亂卒至於難爲嗚呼後之言治體者可以審焉

西南紀事卷二

餘姚邵廷采念魯撰 邵武徐 榦小勿校刊

永寧王

永寧王周宗封江西順治二年南都不守江西諸郡多北
附

大清金聲桓以重兵鎮南昌王傾家募兵起於湖東禮部侍郎
王廷垣知州揭重熙舉人艾南英諸生楊師古與羅川王
皆就之以是秋八月復建昌撫州知府鄢鼎實出走饒信
撫建羣盜響應唐王立手書問王遣鄭彩出永定關因王

兵恢復南昌彩頓不進

大清兵環掠湖東王孤軍督戰親冒矢石是時大學士楊廷麟
守贛州萬元吉扼吉安蘇觀生軍南安遙爲聲援而潮州
五指石帥謝志良願奉節制得兵六萬監軍翰林張家玉
見王計事王執其手托以生死十一月聲桓使王得仁圍
撫州家玉率趙珩李明忠等退

大清兵於許灣遂解撫圍明日謝志良闢羅宋復敗之千金坡
家玉奏上王功請倣漢光武以魯益東海故事或撫或贛
優以大封詔俟南昌恢復卽封親王順治三年正月鄭彩

逃入永定關家玉被圍新城力戰得脫湖東危迫

大清兵遂抵永定家玉請南募兵惠潮

大清兵急攻撫州王登陴死守三月吉安破湖西皆潰王命輔臣傅冠速出江西前軍方及建昌潰歸四月撫州破王死之

常湖

鄖西王名常湖楚人順治四年丁亥六月落魄入閩夜宿荒寺有虎同卧水北源古菴僧王祁奇其貌與俱入古田境上建陽數惡少從之時癸未進士膠州高簡知建寧府

爲政嚴刻郡人怨之鎮兵不滿千人方告大桶將激變而鄉紳陳某與簡隙避之古田遇常湖告以虛實許歸內應

遂以王祁爲左國師李文垣爲右國師招亂兵得萬人七

月五日常湖及竹溪王夜屯於東峯建寧守將曹總兵部

將于應鶴等出城禦戰兵未及交伏起大潰陳某使其黨

大言於衆曰知府貪酷民不聊生城中翕然皆結約圍府

署大索軍人之在城者曹總兵知有變不敢入戰於城下

三日被覆於水西遂開門迎常湖斬簡於市裂其屍通判

唐通降卽以通知府事下檄稱隆武三年初建寧城門鳴

大中寺金剛首無故自折及是人以爲驗八月鄖西兵入
松溪知縣張朝國不降斬之北入慶元聲言往浙江然其
兵烏合無紀律帥領皆科頭草履所至蜂屯求饑土民逃
匿松溪真御史子金鉉使數人於北門外散髮大呼曰大
兵至矣各棄兵杖相蹂踐

大清帥馬得功李榮帥兵二萬自浦城抵松溪金鉉出迎

大清兵不入城竟趨建寧襲鄖西王不克屬縣皆復爲鄖西守

大清兵還屯浦城九月六日鄖西兵復將衆十八日復順昌是

月

大清兵復入松溪殺鄖西知縣戴應選遺民真照時等皆死真
金鈺自負翻城有功亦以唐王貢僇於橋下十二月廿六
日馬得功夜發騎兵五千步一萬出梨頭且分二道進鄖
西兵不利亡前隊五百餘人

大清兵趨大溪尾斬首數千級戊子正月鄖西王在建寧復遣
曾明遠葉和陳士良等率衆數萬由甌寧政和夾走松溪
得功出兵馳之陣斬千餘人生獲九十餘人明遠等棄甲
遁

大清師追至寨嶺乃還十九日

大清師自浦城道松溪趨建寧攻圍自二月至四月城中百計拒守間出戰勝負相當

大清師掘黃華山龍脉置紅夷砲西門攻裂城垣梯戶而上百姓知城破齊聲大呼曰休矣休矣因合府閉門自焚火三日不滅屍氣聞數百里主事朱喬秀文公死之越二年庚寅五月鄭西王故將毛明卿等復起與

大清兵戰於巖關明卿即西驍將也嘗以狼筈獨當

大清兵一隊戰必身先至是集潰衆擾浙閩界又有李希賢奉桂王年號自稱將軍與范恩郎等焚掠甌浦建松境上思

齊南紀事 卷二
即以仙姑占卜無不驗

大清兵潰於東源鄉民應之者數萬至甲午七月乃平

術桂

寧靖王術桂字天球遼王後長楊郡王之次末太祖九世孫也初授輔國將軍方面偉體美鬚工詩文習翰墨和謙接人崇禎十五年張獻忠陷荊州王從惠王及本府宗室避湖中福王立從長楊王入朝晉鎮國將軍居之鹽海明年夏從長楊王至杭州聞南京已破復返台州長楊王率宮眷入閩王留寧海欲變姓名避世會鄭遵謙起兵紹興

奉魯王監國王亦以一旅會江上時傳長楊王未知存沒
遂封王爲長楊王唐王立于福州奉表稱賀仍封長楊聞
其兄尙在已晉遼王乃辭爵欲以長楊之封讓兄之仲子
進唐王不許改封靈靖王督方國安師知國安難與共事
辭督師留居紹興及敗還奔靈海覓漁舟出石浦魯王亦
繇海門來同至舟山鄭芝龍貳於唐王聞魯王至舟山遣
鄭彩以舟師來迎王從魯王抵廈門芝龍已北去明年鄭
彩奉魯王攻福州定國公鴻逵迎淮王於軍中請王爲監
軍合忠孝伯朱成功兵圍泉州月餘不下退軍南灣聞桂

王卽位肇慶王自南灣入揭陽奉表賀命王居鴻達軍中
在所給祿次年桂王命兼督鴻達成功二軍仍屯揭陽四
年冬粵事又敗與鴻達還廈門遷居金門王初無子在紹
興時納袁氏王氏及至金門元妃羅氏舉一女袁舉二子
王一女當是時王已息慮不復言事矣成功大軍圍南京
不克而

大清兵南入緬國亡諸王在海上者寄食鄭氏及成功取臺灣
金廈勢蹙王遂先請東渡甫閱月廈門戰敗又二年成功
死臺灣子錦嗣立有傳錦設桂王位俾王左侍立奏事位

前王與諸臣參決之然錦父子實自帝制成功末年命采
漢中王卽位事殊無朱氏意王年亦向老子女俱殤乃就
竹澗墾田自食錦不能修授餐禮且征其賦幾不免凍餒
耿精忠之變錦舉兵畧據漳泉王意復動乘舟西來以觀
其勢知不足有爲復旋臺灣後錦渡海抽軍王亦按田屨
募益困戊午羅妃逝王杜門謝客壬戌夏大雩步禱始一
出聞

大清師近蒿目獨憂常言臺灣有變我當以身殉癸亥夏澎湖
破六月

大清師傳臺灣鄭氏戰敗王語宮眷曰吾死期已至若等可自便袁氏王氏及侍姬三咸曰王死則從死耳請予只帛並冠笄被服先縊王卮酒舉滿俟含殮明日五棺出葬於郡南前山校隸扶襯至王視之曰未時也卽加翼善冠龍袍東玉佩印綬以寧靖王寶持付鄭克塽拜辭天地祖宗里中人士無老幼皆入拜王答拜乃結帛於梁自磬舉手曰吾去矣遂絕衆扶下坐無變容與羅妃合葬竹瀝不封不樹前數日自書曰自壬午流寇陷荊州攜家南下及丙戌避兵入閩遠潛外國今二十餘年六十有六歲時逢大難

事畢矣王故宅改天妃神祠無嗣繼益王後宗位子儼鈔
爲後年七歲居杞縣

西南紀事卷二